

BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE  
DOM NARODA  
Broj: 02-02-2001/23  
Sarajevo, 31.7.2023. godine

**Z A P I S N I K**  
**3.SJEDNICE DOMA NARODA PARLAMENTA FEDERACIJE BOSNE I**  
**HERCEGOVINE, održane 31.7.2023. godine**

Sjednica je počela sa radom u 12:28.

Sjednici je predsjedavao Tomislav Martinović, predsjedavajući Doma naroda Parlamenta Federacije Bosne i Hercegovine.

Predsjedavajući je pozdravio delegate.

Predsjedavajući je, također, pozdravio potpredsjednike Federacije Bosne i Hercegovine Refika Lendu i Igora Stojanovića, premijera Vlade Federacije Bosne i Hercegovine Nermina Nikšića sa ministrima i predsjednicu Federacije Bosne i Hercegovine Lidiju Bradaru.

Izostanak sa sjednice najavili su delegati Vedrana Vujović i Goran Broćeta.

Prema evidenciji Stručne službe, sjednici prisustvuje 66 delegata, što čini većinu, pa Dom naroda može raditi i punovažno odlučivati.

Predsjedavajući je predložio usvajanje Zapisnika 2. sjednice Doma naroda Parlamenta Federacije Bosne i Hercegovine.

Na osnovu rezultata glasanja, predsjedavajući je konstatovao da je Dom naroda, sa 59 glasova za, bez glasova protiv i bez uzdržanih glasova, usvojio Zapisnik 2. sjednice Doma naroda Parlamenta Federacije Bosne i Hercegovine.

Predsjedavajući je prije utvrđivanja dnevnog reda podsjetio delegate da ako žele na osnovu člana 104. Poslovnika o radu Doma naroda, mogu postavljati delegatska pitanja i pokretati inicijative.

**Emir Dautović** podnio je jednu inicijativu i konstataciju na prethodnu inicijativu. Inicijativu upućuje Vladi Federacije Bosne i Hercegovine i Ministarstvu za promet i saobraćaj u vezi sa izmjenom člana 5., a odnosi se na registaraciju motornih vozila kako bi se omogućilo građanima registrovanje vozila za vlastite potrebe bez zloupotrebljavanja.

Konstatacijom na prethodnu inicijativu upućenu Vijeću ministara radi zatvaranja jednog graničnog prijelaza u USK-u, delegat Emir Dautović traži otvaranje graničnih prijelaza zbog zadržavanja građana prilikom prelaska granice.

**Iva Raguž** postavila je jedno pitanje Federalnom ministarstvu rada i socijalne politike u vezi sa izmjenama i dopunama Zakona o profesionalnoj rehabilitaciji, osposobljivanju i zapošljavanju osoba sa invaliditetom sa ciljem da se u najkraćem roku pokrene postupak za donošenje posebnog propisa kojim bi se prava ove kategorije stanovništva regulisala.

**Sanela Klarić** podnijela je dvije inicijative.

Prva je upućena Federalom ministarstvu za prostorno uređenje i Federalnoj upravi za inspekcijske poslove, a odnosi se na Uredbu o određivanju zahvata u prostoru i građenju zbog njenog vraćanja u prvočitno stanje kako bi se zaštitile rijeke prve kategorije.

Druga inicijativa je upućena Federalnom ministarstvu okoliša i turizma, Ministarstvu trgovine, turizma i saobraćaja Tuzlanskog kantona i Federalnom ministarstvu prometa i komunikacija radi poboljšanja servisa i bolje komunikacije na Međunarodnom aerodromu Tuzla.

**Almir Babajić** je podnio dvije inicijative.

Prvu je uputio premijeru Vlade Federacije Bosne i Hercegovine Nerminu Nikšiću da se hitno uputi u proceduru Prijedlog Odluke o dopuni Odluke o donošenju prostornog plana područja posebnih obilježja od značaja za Federaciju Bosnu i Hercegovinu Autoceste na Koridoru Vc za period 20 godina.

Drugu inicijativu je, također, uputio Vladi Federacije Bosne i Hercegovine i Federalnoj agenciji za upravljanjem oduzetom imovinom kojom traži da se osiguraju novčana sredstva za nabavku terenskog vozila sa računa za posebne namjene Federalne agencije za upravljanje oduzetom imovinom i to sredstva koja su trajno oduzeta i nisu uplaćena u budžet Federacije Bosne i Hercegovine u cilju nabavke terenskog vozila za Gorskiju službu spašavanja stanice Zenica od Vlade GSS u Zenici.

**Damir Marjanović** je postavio dva delegatska pitanja.

Prvo pitanje je upućeno Federalnom ministarstvu obrazovanja i to ministrici Jasni Duraković - da li i kako planira preuzeti ulogu u procesu reforme obrazovanja u Federaciji Bosne i Hercegovine koja je Ustavom određena i ima svoju nadležnost, te da li planira da koordinira tu reformu sa kantonima u kojima je već pokrenuto i gdje se u tim aktivnostima pronalazi modernizacija udžbenika.

Drugo pitanje je u pogledu novca koji se izdvaja za nauku i obrazovanje u Federaciji Bosne i Hercegovine.

**Aida Obuća** je postavila jedno pitanje Vladi Federacije Bosne i Hercegovine i Ministarstvu pravde. Pitanje se odnosi na izmjene Nacrta Zakona i dopunu Krivičnog zakona Federacije Bosne i Hercegovine kako bi se uskladio sa Konvencijom Vijeća Evrope o prevenciji i borbi protiv nasilja nad ženama i nasilja u porodici kao i Konvencijom Vijeća Evrope o zaštiti djece od seksualnog iskorištavanja i seksualnog zlostavljanja, te pita u kojoj fazi se nalazi ovaj proces, koji je status predloženih izmjena i koji je stav Ministarstva pravde u vezi sa ovim pitanjem.

**Boris Mrnjavac** pitanje je uputio Federalnom ministru unutrašnjih poslova gospodinu Rami Isaku - šta je konkretno poduzeto na prikupljanju dokaza protiv mladića Samira Nukića koji je na društvenim mrežama komentarirao posjetu Visokog predstavnika Christiana Schmidta spomen-obilježju ubijenoj djeci u Vitez, te zatražio odgovor kada će Nukić kazneno odgovarati za mržnju koju je javno pokazivao prema ubijenoj djeci.

**Ivana Šaravanja-Zrimšek** je postavila jedno pitanje i uputila jednu inicijativu. Pitanje je uputila ministrima unutrašnjih poslova i pravde Federacije Bosne i Hercegovine Rami Isaku i Vedranu Škobiću i zatražila detaljnije podatke o tome čijim propustom je general Armije Bosne i Hercegovine Sakib Mahmuljin, nekadašnji komandant 3. korpusa Armije Bosne i Hercegovine, koji je u aprilu ove godine pred sudom Bosne i Hercegovine pravomočno osuđen na osam godina zatvora za ratne zločine, otišao na liječenje u Tursku i time izbjegao zatvor.

Inicijativu je, također, uputila ministrima unutrašnjih poslova i pravde Federacije Bosne i Hercegovine da se optuženima za ratne zločine uz zatvorsku kaznu istog trenutka odredi i mjera zabrane napuštanja zemlje, a onima koji izbjegavaju kaznu ili suđenje iz zdravstvenih razloga dodatno preispitaju razlozi, odnosno da se zatraži drugo i treće lječničko mišljenje kako se ne bi dalje nanosile patnje i bol porodicama žrtava.

**Ivo Šimunović** je postavio jedno pitanje Tužilaštvu Federacije Bosne i Hercegovine na temu istrage i procesuiranja ratnih zločina koje su na području općine Jajce počinile jedinice vojske Republike Srpske u periodu od 1992. godine do 1995. godine, a koje se odnosi na identifikovanje počinitelja ratnih zločina nad civilima i civilnim objektima i infrastrukturom na području općine Jajce za vrijeme ratnih djelovanja 1992. godine i u vrijeme okupacije Jajca 1992. - 1995. godina.

**Miomirka Melank** je postavila dva pitanja.

Prvim pitanjem je predložila skraćivanje zvona koje poziva na sjednicu a koje traje pola sata na 30 sekundi ili jedan minut.

Drugo pitanje je uputila Federalnom ministarstvu kulture i sporta i Ministarstvu prosvjete i kulture Republike Srpske i glasi - na koji način je izabrana stručna komisija, prema kojem dokumentu i ko je ove godine učestvovao u radu te komisije, koja je donijela odluku o izboru učesnika na jubilarnom 60. bienalu umjetnosti u Veneciji i koliko je bilo prijavljenih učesnika na javni poziv.

**Arman Zalihić** je pozvao Vladu da revidira jedan zaključak prethodne Vlade od 17. marta 2022. godine. Tada je Vlada donijela zaključak kojim traži od Centra za uklanjanje mina u Bosni i Hercegovini da pripremi i uvrsti u listu prioriteta za razminiranje jedno mikropodručje kraj naselja Kutilivač kod Mostara, koje je predviđeno za kamenolom.

**Belma Kapo** je pozvala Federalno ministarstvo zdravstva da revidira Pravilnik za planove i programe specijalizacija te da ih uskladi sa zemljama EU kako bi se dobio kadar za rad.

**Haris Zahiragić** je postavio četiri delegatska pitanja.

Prvo pitanje je uputio Vladi Federacije Bosne i Hercegovine, Federalnom ministarstvu unutrašnjih poslova i Federalnom ministru pravde - da li su i ako nisu zašto nisu tražili informaciju od Ministarstva sigurnosti, Obavještajno-sigurnosne agencije i Agencije za istrage i zaštitu o broju i načinu učešća naših državljana na stranom ratištu između Rusije i Ukrajine, te koliko je sigurnosna prjetnja takve vrste učešća na takvoj vrsti ratišta u Evropi.

Drugo pitanje je uputio Vladi Federacije Bosne i Hercegovine i Federalnom ministarstvu unutrašnjih poslova - da li imaju i ako nemaju da hitno naprave sigurnosnu procjenu koliko se stranih državljana, potencijalnih pripadnika paravojnih formacija kao što su Wagner ili Noćni vukovi, nalazi na teritoriji Federacije Bosne i Hercegovine i takvu vrstu informacije dostave u oba doma Parlamenta Federacije Bosne i Hercegovine.

Treće pitanje je uputio Federalnom ministarstvu kulture i sporta i Vladi Federacije Bosne i Hercegovine, zašto Narodno pozorište, Franjevački muzej i Galerija „Gorica Livno“ vrijedi isto ili više od Zemaljskog muzeja BiH kao najznačajnije institucije kulture u Bosni i Hercegovini.

Četvrto pitanje odnosilo se na činjenicu kako federalni ministar unutrašnjih poslova koristi službeni helikopter.

**Jelena Pekić** je postavila jedno delegatsko pitanje i to Vladi Federacije Bosne i Hercegovine, a odnosi se na reformski set zakona (Zakon o porezu na dohodak, Zakon o doprinosima i Zakon o minimalnoj plaći), kakva su očekivanja Vlade Federacije Bosne i Hercegovine vezano uz upućivanje ovih zakonskih rješenja ponovo u parlamentarnu proceduru kako bi mogli uputiti svoje inicijative i pripremiti se za njih.

Nakon toga prešlo se na utvrđivanje dnevnog reda.

Predsjedavajući je podsjetio delegate da je Vlada Federacije Bosne i Hercegovine dostavila akt kojim iz parlamentarne procedure radi dorade povlači Prijedlog Odluke o izmjenama i dopunama Budžeta Federacije Bosne i Hercegovine za 2023. godinu i Prijedlog Zakona o izmjenama i dopunama Zakona o izvršenju Budžeta Federacije Bosne i Hercegovine za 2023. godinu, a u međuvremenu je dostavljen akt kojim se traži povlačenje Rebalansa finansijskog plana Zavoda zdravstvenog osiguranja i reosiguranja Federacije BiH za 2023. godinu.

Delegatkinja **Amra Babić** je predložila dopunu dnevnog reda da se uvrsti razmatranje Zaključaka Odbora za ekonomsku i razvojnu politiku vezano uz status Agencije za privatizaciju Federacije Bosne i Hercegovine.

Na osnovu rezultata glasanja, predsjedavajući je konstatovao da je ovaj prijedlog, sa 40 glasova za, uz 13 uzdržanih glasova i uz tri glasa protiv, dobio potrebnu većinu tako da je prihvaćen prijedlog da se ova tačka uvrsti kao posebna tačka dnevnog reda.

Vlada Federacije Bosne i Hercegovine dostavila je Prijedlog Zakona o izmjenama i dopunama Zakona o trezoru u Federaciji Bosne i Hercegovine sa prijedlogom da se razmatra po skraćenom postupku.

Sa 58 glasova za, uz 1 uzdržani glas i bez glasova protiv, predsjedavajući je konstatovao da je prihvaćeno da se Prijedlog Zakona o izmjenama i dopunama Zakona o trezoru u Federaciji Bosne i Hercegovine razmatra po skraćenom postupku.

Poslije zaključene rasprave o izmjenama i dopunama dnevnog reda i povlačenja tri tačke dnevnog reda (Prijedlog Odluke o izmjenama i dopunama Budžeta Federacije Bosne i Hercegovine za 2023. godinu, Prijedlog Zakona o izmjenama i dopunama Zakona o izvršenju Budžeta Federacije Bosne i Hercegovine za 2023. godinu i Rebalans finansijskog plana Zavoda zdravstvenog osiguranja i reosiguranja Federacije Bosne i Hercegovine za 2023. godinu), prešlo se na glasanje i usvajanje dnevnog reda.

Na osnovu rezultata glasanja, predsjedavajući je konstatovao da je Dom naroda, sa 63 glasa za, uz jedan uzdržan glas i bez glasova protiv, usvojio sljedeći:

## **D N E V N I R E D**

1. Dokument okvirnog Budžeta Federacije Bosne i Hercegovine za period 2024. – 2026. godina,
2. Prijedlog Zakona o izmjenama i dopunama Zakona o trezoru u Federaciji Bosne i Hercegovine – skraćeni postupak,
3. Prijedlog Zakona o energiji i regulaciji energetskih djelatnosti u Federaciji Bosne i Hercegovine,
4. Prijedlog Zakona o električnoj energiji Federacije Bosne i Hercegovine,
5. Prijedlog Zakona o korištenju obnovljivih izvora energije i efikasne kogeneracije,
6. Prijedlog Zakona o zaštiti civilnih žrtava rata u Federaciji Bosne i Hercegovine,
7. Nacrt Zakona o izmjenama i dopunama Zakona o prekršajima,
8. Informacija Federalnog ministarstva energije, rudarstva i industrije o aktivnostima u postupku izdavanja energetske dozvole za izgradnju VE Slovinj privrednog društva „Vjetrolektrane“ d.o.o. Glamoč i Prijedlog Zaključka o davanju prethodne saglasnosti u postupku izdavanja energetske dozvole privrednom društvu „Vjetrolektrane“ d.o.o. Glamoč,
9. Izvještaj Fonda za profesionalnu rehabilitaciju i zapošljavanje osoba sa invaliditetom za 2022. godinu,
10. Izvještaj o zaduženju Federacije Bosne i Hercegovine na osnovu emisije (7Y) obveznica,
11. Kvartalni izvještaj o dugu Q1/2023,
12. Godišnji plan zaduživanja Federacije Bosne i Hercegovine za 2023. godinu,
13. Zaključci Odbora za ekonomsku i razvojnu politiku vezano uz status Agencije za privatizaciju Federacije Bosne i Hercegovine,
14. Izbor i imenovanja.

## **1. Dokument okvirnog Budžeta Federacije Bosne i Hercegovine za period 2024. – 2026. godina**

Vlada Federacije dostavila je radi informiranja Doma naroda Parlamenta Federacije Bosne i Hercegovine Dokument okvirnog Budžeta Federacije Bosne i Hercegovine za period 2024. - 2026. godina.

Dokument su razmatrala nadležna radna tijela.

Predsjedavajući je pozvao predstavnika Vlade Federacije Bosne i Hercegovine i predstavnike radnih tijela da obrazlože izvještaje.

U raspravi niko nije učestvovao.

Budući da je Dokument dostavljen radi informiranja, predsjedavajući je konstatovao da je Dom naroda Parlamenta Federacije Bosne i Hercegovine primio na znanje Dokument okvirnog Budžeta Federacije Bosne i Hercegovine za period 2024. – 2026. godina.

## **2. Prijedlog Zakona o izmjenama i dopunama Zakona o trezoru u Federaciji Bosne i Hercegovine – skraćeni postupak**

Tekst Prijedloga Zakona utvrdila je Vlada Federacije Bosne i Hercegovine.

Predstavnički dom obavjestio je Dom naroda da je na 4. sjednici, održanoj 25.7.2023. godine, usvojio Prijedlog Zakona o izmjenama i dopunama Zakona o trezoru u tekstu kako ga je predložila Vlada Federacije Bosne i Hercegovine.

Prijedlog Zakona razmatralo je nadležno radno tijelo.

Predsjedavajući je pozvao Marija Glibića, pomoćnik za trezor u Federalnom ministarstvu finansija, da obrazloži Prijedlog Zakona.

U raspravi niko nije učestvovao.

Na osnovu rezultata glasanja, predsjedavajući je konstatovao da je Dom naroda, sa 62 glasa za, bez uzdržanih glasova i bez glasova protiv, usvojio Prijedlog Zakona o izmjenama i dopunama Zakona o trezoru u Federaciji Bosne i Hercegovine.

## **3. Prijedlog Zakona o energiji i regulaciji energetskih djelatnosti u Federaciji Bosne i Hercegovine**

Tekst Prijedloga Zakona utvrdila je Vlada Federacije Bosne i Hercegovine.

Predstavnički dom Parlamenta Federacije obavjestio je Dom naroda da je na 3. sjednici, održanoj 6.7.2023. godine, usvojio Prijedlog Zakona o energiji i regulaciji

energetskih djelatnosti u Federacije Bosne i Hercegovine u tekstu kako ga je predložila Vlada Federacije Bosne i Hercegovine.

Prijedlog Zakona razmatrala su nadležna radna tijela.

Predsjedavajući je pozvao predstavnika Vlade ministra Vedrana Lakića da obrazloži Prijedlog Zakona.

U raspravi su učestvovali: Muamer Zukić, Ivan Odak, Haris Zahiragić, Irfan Čengić, Vedran Lakić, Tomislav Martinović, Aljoša Čampara, Aida Obuća i Sanela Klarić.

Na osnovu rezultata glasanja, predsjedavajući je konstatovao da je Dom naroda, sa 57 glasova za, uz 1 uzdržani glas i bez glasova protiv, usvojio Prijedlog Zakona o energiji i regulaciji energetskih djelatnosti u Federaciji Bosne i Hercegovine.

#### **4. Prijedlog Zakona o električnoj energiji Federacije Bosne i Hercegovine**

Tekst Prijedloga Zakona utvrdila je Vlada Federacije Bosne i Hercegovine.

Predstavnički dom obavjestio je Dom naroda da je na 3. sjednici, održanoj 6.7.2023. godine, usvojio Prijedlog Zakona o električnoj energiji Federacije Bosne i Hercegovine sa dva amandmana, koja je Vlada Federacije Bosne i Hercegovine prihvatile pa su postali sastavni dio Prijedloga Zakona.

Na prijedlog Zakona delegat Ivo Tadić podnio je dva amandmana a odnose se na čl. 167. i 171. Vlada Federacije Bosne i Hercegovine dostavila je izjašnjenje kojim prihvata amandmane Ive Tadića, a amandmani su istovjetni amandmanima koje je Vlada Federacije Bosne i Hercegovine prihvatile u Predstavničkom domu.

Prijedlog Zakona razmatrala su nadležna radna tijela.

Predsjedavajući je pozvao predstavnika Vlade ministra Vedrana Lakića da obrazloži Prijedlog Zakona o električnoj energiji Federacije Bosne i Hercegovine.

Predsjedavajući je pozvao predstavnike radnih tijela da obrazlože izvještaje Vesnu Saradžić, Ivana Odaka, Harisa Zahiragića i ministra Vedrana Lakića.

U raspravi niko nije učestvovao.

Sa 60 glasova za, bez uzdržanih glasova i uz pet glasova protiv, Dom naroda usvojio je Prijedlog Zakona o električnoj energiji Federacije Bosne i Hercegovine.

Predsjedavajući je predložio zaključak da Vlada Federacije Bosne i Hercegovine kod utvrđivanja zvaničnih tekstova zakonskih akata koji dolaze na usvajanje u oba doma Parlamenta Federacije Bosne i Hercegovine vodi računa o njihovoј usklađenosti, odnosno da svi ti akti budu identični na bosanskom, hrvatskom i srpskom jeziku.

Sa 61 glasom za, bez uzdržanih glasova i bez glasova protiv, Dom naroda je prihvatio sljedeći:

## Z A K L J U Č A K

Zadužuje se Vlada Federacije da prilikom dostavljanja akata u parlamentarnu proceduru vodi računa da akti na svim službenim jezicima Federacije Bosne i Hercegovine budu istovjetni.

### **5. Prijedlog Zakona o korištenju obnovljivih izvora energije i efikasne kogeneracije**

Tekst Prijedloga Zakona utvrdila je Vlada Federacije Bosne i Hercegovine i naknadno je dostavila devet amandmana, koji su postali sastavni dio teksta Prijedloga Zakona.

Predstavnički dom Parlamenta Federacije Bosne i Hercegovine obavjestio je Dom naroda da je na 3. sjednici, održanoj 6.7.2023. godine, usvojio Prijedlog Zakona o korištenju obnovljivih izvora energije efikasne kogeneracije sa devet amandmana Vlade i šest amandmana koje je Vlada Federacije Bosne i Hercegovine prihvatile, te su postali sastavni dio Prijedloga Zakona.

Na Prijedlog Zakona amandmane su podnijeli delegati Damir Džeba, Ivo Tadić, Aida Obuća i Fatima Gavrankapetanović-Smajlbegović. Damir Džeba podnio je pet amandmana na čl. 17., 27., 52., 55. i 56.; Ivo Tadić podnio je devet amandmana na čl.: 3., 17., 28., 33., 34., 46., 48., 49. i 50.; Aida Obuća podnijela je četiri amandmana na čl. 18., 47., 26. i 27. a Fatima Gavrankapetanović-Smajilbegović podnijela je jedan amandman na član 52. Amandmani su dostavljeni Vladi Federacije Bosne i Hercegovine a ona je dostavila izjašnjenje na te amandmane.

Amandman I. Damira Džeba je prihvaćen, Amandman II. djelimično dok amandmani III., IV. i V. nisu prihvaćeni.

Amandmani I., VII., VIII. i IX. Ive Tadića se ne prihvataju, Amandman II. je prihvaćen kako ga je predložila Vlada Federacije Bosne i Hercegovine u svom izjašnjenju, amandmani III. i IV. su prihvaćeni, Amandman V. je Vlada prihvatile na način kako je navedeno u svom izjašnjenju a Amandman VI. je djelimično prihvaćen. Amandmani Damira Džeba i Ive Tadića su identični amandmanima o kojima se Vlada izjasnila prilikom održavanja sjednice Predstavničkog doma.,

Amandmani I., II. i III. Aide Obuće nisu, dok je amandman IV. prihvaćen.

Amandman Fatime Gavrankapetanović-Smajilbegović Vlada Federacije Bosne i Hercegovine nije prihvatile.

Amandman I. koji je Vlada Federacije Bosne i Hercegovine prihvatile na sjednici Predstavničkog doma glasi:

Amandman I.

U članu 17. u tački cc) interpunkcijski znak: „ .“ zamjenjuje se interpunkcijskim znakom: „ ,“ a iza tačke cc) dodaje se nova tačka dd) koja glasi:

„dd) zaključivanje ugovora o uređenju međusobnih odnosa sa nadležnim operatorom distribucijskog sistema“ je izmjenjen na sjednici Doma naroda na način da je Vlada Federacije Bosne i Hercegovine u izjašnjenu koje je dostavila Domu naroda koji se odnose na amandmane koje su podnijeli delegati u Domu naroda Ivo Tadić i Damir Džeba se izjasnila da prihvata Amandman koji se odnosi na član 17. na sljedeći način:

### “Član 17.

Operator za OIEiUK ima sljedeće nadležnosti:

- a) donosi interna pravila rada i poslovanja operatora za OIEiUK,
- b) donosi uputstvo o radu Balansne grupe OIE,
- c) usvaja, uz saglasnost Ministarstva, pravilnik o aukcijama, provodi procese i postupke aukcija,
- d) donosi, uz saglasnost Vlade Federacije, program o sufinansiranju prosumera iz kategorije kućanstva,
- e) prikuplja, obrađuje i vodi evidenciju o ukupnoj električnoj energiji proizvedenoj u postrojenjima koji koriste OIE iz kojih operator za OIEiUK vrši otkup električne energije,
- f) prikuplja, obrađuje i vodi evidenciju o ukupnoj električnoj energiji proizvedenoj u postrojenjima prosumera,
- g) u skladu sa članom 45. ovog zakona na zahtjev potencijalno privilegovanog proizvođača zaključuje predugovor o dodjeli premije,
- h) u skladu sa članom 45. ovog zakona na zahtjev privilegovanog proizvođača zaključuje ugovor o dodjeli premije,
- i) u skladu sa članom 44. ovog zakona na zahtjev potencijalnog privilegovanog proizvođača zaključuje predugovor za otkup električne energije,
- j) u skladu sa članom 44. ovog zakona na zahtjev privilegovanog proizvođača zaključuje ugovor o otkupu električne energije,
- k) vrši obračun i isplatu finansijskih sredstava za isporučenu električnu energiju privilegovanim proizvođačima koji su zaključili ugovor sa operatorom za OIEiUK,
- l) vrši isplatu premija privilegovanim proizvođačima koji su zaključili ugovor o dodjeli premije,
- m) sa svakim pojedinačnim opskrbljivačem koji opskrbljuje kupce iz Federacije, sklapa ugovor kojim će se detaljno urediti sva međusobna prava i obaveze, uključujući prikupljanje naknade iz člana 27. stav (1) ovog zakona,
- n) izrađuje analize proizvedenih količina električne energije u odnosu na količine električne energije proizvedene iz OIE predviđene planskim dokumentom za energiju i klimu Federacije,
- o) vrši fakturisanje i naplatu fakturisanih sredstava od opskrbljivača za isporučenu električnu energiju proizvedenu u postrojenjima koji koriste OIE a iz kojih operator za OIEiUK vrši otkup električne energije,

- p) prikuplja i obrađuje podatke o ukupnoj finalnoj potrošnji električne energije u Federaciji koje dostavljaju operatori distribucijske mreže, opskrbljivači i kupci koji samostalno nabavljaju električnu energiju za vlastite potrebe iz uvoza, na mjesecnom nivou radi obračuna naknada,
- r) vrši isplatu sredstava za balansiranje elektroenergetskog sistema nadležnom tijelu za članove balansne grupe OIE ili balansno odgovornoj strani sa kojom operator za OIEiUK zaključi ugovor o prijenosu balansne odgovornosti,
- s) vodi poseban transakcijski račun za obračun i plaćanje električne energije proizvedene iz OIEiUK,
- t) provodi propisane aktivnosti vezane uz promovisanje OIEiUK u skladu sa članom 51. ovog zakona,
- u) dostavlja izvještaje o svim provedenim aukcijama u skladu sa ovim zakonom,
- v) dostavlja polugodišnje i godišnje izvještaje o radu i poslovanju Vladi Federacije Ministarstvu i Regulatornoj komisiji,
- z) vodi Registar garancije porijekla, te izdaje, vrši prijenos i poništavanje garancija porijekla električne energije,
- aa) utvrđuje administrativnu barijeru,
- bb) zaključuje ugovor o uređenju međusobnih odnosa sa nadležnim operatorom distributivnog sistema.”.

Amandman IV. koji je Vlada Federacije prihvatile na sjednici Predstavničkog doma glasi:

U članu 3. stav c) mijenja se i glasi: "Aukcija za mala postrojenja - FIT aukcija je proces nadmetanja kojim se pobjedniku/pobjednicima dodjeljuje pravo prodaje električne energije proizvedene iz OIEiUK iz malih postrojenja, a nadmetanje se vrši za tehnološke kvote definirane u jedinicama instalirane snage (kW),".

U članu 3. stav d) mijenja se i glasi: "Aukcija za velika postrojenja - FIP aukcija je proces nadmetanja kojim se pobjedniku/pobjednicima dodjeljuje poticaj u vidu fiksne premije po isporučenom MWh električne energije iz OIEiUK iz velikih postrojenja, pritome se nadmetanje vrši za tehnološke kvote definirane u jedinicama instalirane snage (kW),".

U članu 3. stav dd) mijenja se i glasi: "Obim aukcije označava maksimalnu količinu električne energije iz obnovljivih izvora energije iskazanu u GWh koja će biti poticana putem fiksnih premija putem provođenja aukcija,".

U članu 3. stav ss) mijenja se i glasi: "Tehnološka kvota označava maksimalnu instaliranu snagu postrojenja iz obnovljivih izvora energije iskazanu u kW koja će biti poticana putem garantirane otkupne cijene tokom jedne kalendarske godine,".

U članu 34. u stavu (3) riječi: "količina energije" zamjenjaju se riječima: „instaliranih snaga“.

U članu 37. u stavu (2) riječi: "proizvodnje" zamjenjaju se riječima: "instalirane snage".

Amandman IV. u dijelu koji se odnosi na član 3. stav d) je izmijenjen na sjednici Doma naroda jer se Vlada Federacije Bosne i Hercegovine u Izjašnjenju koje je dostavila Domu naroda, a odnosi se na amandmane delegata (Ivo Tadić i Damir Džeba), izjasnila da prihvata Amandman koji se odnosi na član 3. stav d) na sljedeći način:

U članu 3. stav d) mijenja se i glasi: "Aukcija za velika postrojenja - FIP aukcija je proces nadmetanja kojim se pobjedniku/pobjednicima dodjeljuje poticaj u vidu fiksne premije po isporučenom MWh električne energije iz OIEiUK iz velikih postrojenja, nadmetanje se pritom vrši za obim aukcija definiran u jedinicama instalirane snage (kW).".

Amandman VI. koji je Vlada Federacije Bosne i Hercegovine prihvatile na sjednici Predstavničkog doma glasi:

"U članu 27. st. (6) i (7) se brišu.

U članu 41. stav (4) se briše.".

Amandman VI. je izmijenjen na sjednici Doma naroda jer se Vlada Federacije Bosne i Hercegovine u Izjašnjenju koje je dostavila Domu naroda, a odnosi se na amandmane delegata u Domu naroda (Ivo Tadić i Damir Džeba), izjasnila da prihvata Amandman koji se odnosi na član 27. na sljedeći način:

U članu 27. st. (6) i (7) se brišu a st. (8), (9), (10) i (11) postaju st. (6), (7), (8) i (9).

U članu 27. stav (8) koji je Vlada Federacije prihvatile na sjednici Predstavničkog doma a koji je glasio:

"(8) Proizvođaču električne energije koji koristi OIE a koji je u periodu investiranja primao državnu pomoć srazmjerno se umanjuje garantirana otkupna cijena ili premija." se mijenja i glasi:

"(8) Proizvođaču električne energije koji koristi OIE, a koji je u periodu investiranja primao državnu pomoć za postrojenje za proizvodnju električne energije proizvedene iz OIEiUK, čija je proizvodnja predmet poticanja, srazmjerno se umanjuje garantirana otkupna cijena ili premija.",

Prijedlog zakona razmatrala su nadležna radna tijela.

Predsjedavajući je pozvao ministra Vedrana Lakića, predstavnika Vlade, da obrazloži Prijedlog Zakona.

Predsjedavajući je pozvao predstavnike radnih tijela Vesnu Saradžić, Ivana Odaka i Harisa Zahragića da obrazlože izvještaje.

U raspravi su učestvovali: Muamer Zukić, Aljoša Čampara, Tomislav Martinović, Fatima Gavrankapetanović-Smajilbegović, Oliver Soldo, Aida Obuća, Haris Zahiragić, Sanela Klarić, Irfan Čengić, Damir Džeba, Belma Kapo, Almir Babajić i ministar Vedran Lakić.

Predsjedavajući je pozvao podnosioce amandmana da se izjasne da li odustaju od amandmana koje Vlada Federacije nije prihvatile ili su zadovoljni djelimično prihvaćenim amandmanima.

Delegatkinja Fatima Gavrankapetanović-Smajilbegović je ostala pri amandmanu koji je predložila.

Na osnovu rezultata glasanja, predsjedavajući je konstatovao da Dom naroda, sa 21 glasom za, uz 25 uzdržanih glasova i uz 11 glasova protiv, nije prihvatio ovaj amandman.

Delegatkinja Aida Obuća je odustala od amandmana I., II. i III. a Amandman IV. je prihvaćen te nije potrebno izjašnjavanje.

Budući da je Vlada jedan dio amandmana prihvatila, jedan djelimično prihvatile delegat Ivo Tadić je odustao od preostalih amandmana.

Delegat Damir Džeba je odustao od amandmana koje Vlada nije prihvatile.

Na osnovu rezultata glasanja, predsjedavajući je konstatovao da je Dom naroda, sa 55 glasova za, uz dva uzdržana glasa i uz pet glasova protiv, usvojio Prijedlog Zakona o korištenju obnovljivih izvora energije i efikasne kogeneracije.

Budući da je Dom naroda Parlamenta Federacije Bosne i Hercegovine usvojio amandmane I., IV., VI. u drugačijem tekstu u odnosu kako ih je usvojio Predstavnički dom, potrebno je da se Predstavnički dom izjasni o ovim amandmanima u tekstu kako ih je usvojio Dom naroda.

Delegat Oliver Soldo je predložio a Dom naroda, sa 54 glasa za, uz dva uzdržana glasa i uz tri glasa protiv, prihvatio sljedeći:

## ZAKLJUČAK

1. Zadužuje se firma Elektroprijenos BiH, d.d. kao i Regulatorna komisija za energiju u Federaciji Bosne i Hercegovine i druge nadležne institucije da hitno razmotre kapacitete postojeće mreže magistralnih vodova za prijenos električne energije te u skladu liberalizaciji izgradnje i povećanju interesu investitora za ulaganja u obnovljive izvore energije usklade i svoje planove povećanja kapaciteta naročito za izvozne pravce kako ne bi došlo do kolapsa mreže u bliskoj budućnosti i kako bi proizvedena energija mogla pronaći svoje kupce i na taj način se ovaj strateški emergent stavi u punu funkciju, kako za investitore tako i za državu Bosnu i Hercegovinu. Također, od nadležnih institucija traži se usklađen razvoj entiteta i područja koji raspolažu prirodnim resursom za navedenu proizvodnju.

2. Ovaj zaključak stupa na snagu danom donošenja i objavit će se u „Službenim novinama Federacije BiH“.

## **6. Prijedlog Zakona o zaštiti civilnih žrtava rata u Federaciji Bosne i Hercegovine**

Tekst Prijedloga Zakona utvrdila je Vlada Federacije Bosne i Hercegovine.

Vlada Federacije dostavila je amandman koji je postao sastavni dio Prijedloga Zakona. Predstavnički dom Parlamenta Federacije Bosne i Hercegovine je obavjestio Dom naroda da je na 4. sjednici, održanoj 25.7.2023. godine, usvojio Prijedlog Zakona o zaštiti civilnih žrtava rata u Federaciji Bosne i Hercegovine sa amandmanom Vlade Federacije Bosne i Hercegovine koji je postao sastavni dio Prijedloga Zakona. Tom prilikom usvojeni su i zaključci.

Prijedlog Zakona razmatrala su nadležna radna tijela, a predsjedavajući je pozvao ministra Adnana Delića, predstavnika Vlade, da obrazloži Prijedlog Zakona.

U raspravi su učestvovali: Damir Džeba, Aida Obuća, Irfan Čengić, Haris Zahiragić, Ilija Nakić, Ivan Ivić, Amir Orlović i ministar Adnan Delić.

Delegat Damir Džeba, predsjednik Kluba hrvatskih delegata, podnio je devet amandmana koje Vlada Federacije Bosne i Hercegovine nije prihvatile, te je zatražio pojedinačno izjašnjavanje o svakom amandmanu.

Sa 22 glasa za, uz 39 uzdržanih glasova i uz tri glasa protiv, Dom naroda nije prihvatio amandman I.

Sa 22 glasa za, uz 41 uzdržani glas i uz dva glasa protiv, Dom naroda nije prihvatio amandman II.

Sa 22 glasa za, uz 40 uzdržanih glasova i uz tri glasa protiv, Dom naroda nije prihvatio amandman III.

Sa 22 glasa za, uz 38 uzdržanih glasova i uz tri glasa protiv, Dom naroda nije prihvatio amandman IV.

Sa 22 glasa za, uz 38 uzdržanih glasova i uz tri glasa protiv, Dom naroda nije prihvatio amandman V.

Sa 23 glasa za, uz 39 uzdržanih glasova i uz dva glasa protiv, Dom naroda nije prihvatio amandman VI.

Sa 23 glasa za, uz 36 uzdržanih glasova i uz tri glasa protiv, Dom naroda nije prihvatio amandman VII.

Sa 19 glasova za, uz 34 uzdržana glasa i uz pet glasova protiv, Dom naroda nije prihvatio amandman VIII.

Sa 21 glasom za, uz 37 uzdržanih glasova i uz četiri glasa protiv, Dom naroda nije prihvatio amandman IX.

Sa 44 glasa za, uz 19 uzdržana glasova i uz dva glasa protiv, Dom naroda usvojio je Prijedlog Zakona o zaštiti civilnih žrtava rata u Federaciji Bosne i Hercegovine.

Delegat Haris Zahirović predložio je zaključak kojim traži od Vlade Federacije Bosne i Hercegovine da osigura dodatna sredstva za primjenu prava definiranih Zakonom o civilnim žrtvama rata, kao i od Ministarstva za rad i socijalnu politiku Federacije da izradi program finansijske pomoći za logoraše i da im na najadekvatniji način pomogne u isplati sredstava nastalih sudskih troškova nad imovinom nakon izgubljene parnice od Republike Srpske.

Na osnovu rezultata glasanja predsjedavajući je konstatovao da Dom naroda, sa 34 glasa za, uz 12 uzdržanih glasova i uz 18 glasova protiv, nije prihvatio ovaj zaključak. Također, delegat Haris Zahirović tražio je i pojedinačno izjašnjavanje. Na osnovu pojedinačnog glasanja predsjedavajući je konstatovao da, sa 32 glasa za, uz 16 uzdržanih glasova i uz 10 glasova protiv, zaključak nije dobio potrebnu većinu.

## **7. Nacrt Zakona o izmjenama i dopuni Zakona o prekršajima**

Nacrt Zakona utvrdila je Vlada Federacije Bosne i Hercegovine.

Nacrt Zakona razmatralo je nadležno radno tijelo.

Predsjedavajući je pozvao predstavnika Vlade ministra Vedrana Škobića da obrazloži Nacrt Zakona o izmjenama i dopuni Zakona o prekršajima.

U raspravi niko nije učestvovao.

Na osnovu rezultata glasanja, predsjedavajući je konstatovao da je Dom naroda, sa 52 glasa za, uz 1 uzdržani glas i bez glasova protiv, prihvatio sljedeći:

## **Z A K L J U Č A K**

1. Dom naroda Parlamenta Federacije Bosne i Hercegovine prihvata Nacrt Zakona o izmjenama i dopuni Zakona o prekršajima i smatra da može poslužiti kao osnov za izradu prijedloga Zakona.
2. Zadužuje se predlagač da prilikom izrade prijedloga Zakona ima u vidu primjedbe, prijedloge i sugestije koje su dostavljene ili će biti dostavljene u pisanoj formi.

**8. Informacija Federalnog ministarstva energije, rudarstva i industrije o aktivnostima u postupku izdavanja energetske dozvole za izgradnju VE Slovinj privrednog društva "Vjetrolektrane" d.o.o. Glamoč i Prijedlog Zaključka o davanju prethodne saglasnosti u postupku izdavanja energetske dozvole privrednom društvu „Vjetrolektrane“ d.o.o. Glamoč**

Informaciju je utvrdila Vlada Federacije Bosne i Hercegovine i dostavila je Parlamentu Federacije Bosne i Hercegovine. Vlada je dostavila Prijedlog Zaključka o davanju prethodne saglasnosti u postupku izdavanja energetske dozvole navedenom privrednom društvu.

Predstavnički dom Parlamenta Federacije Bosne i Hercegovine obavjestio je Dom naroda Parlamenta Federacije Bosne i Hercegovine da je na 3. sjednici, održanoj 6.7.2023. godine, razmatrao Informaciju o aktivnostima u postupku izdavanja energetske dozvole za izgradnju VE Slovinj privrednom društvu VE d.o.o. Glamoč i donio Zaključak o davanju prethodne saglasnosti u postupku izdavanja energetske dozvole privrednom društvu VE d.o.o. Glamoč.

Informaciju su razmatrala nadležna radna tijela.

Predsjedavajući je pozvao predstavnika Vlade Federacije da obrazloži ovu informaciju.

U raspravi niko nije učestvovao.

Na osnovu rezultata glasanja, predsjedavajući je konstatovao da je Dom naroda, sa 47 glasova za, 3 suzdržana glasa i bez glasova protiv, prihvatio sljedeći:

**Z A K L J U Č A K**

**o davanju prethodne saglasnosti u postupku izdavanja energetske dozvole privrednom društvu „Vjetrolektrane“ d.o.o. Glamoč**

I.

Daje se prethodna saglasnost Federalnom ministarstvu energije, rudarstva i industrije u postupku izdavanja energetske dozvole privrednom društvu „Vjetrolektrane“ d.o.o. Glamoč za izgradnju vjetrolektrane VE Slovinj instalirane nazivne snage 138 megavata 23x6 megavata, odobrene snage priključenja 138 megavata 23x6 megavata planirane godišnje proizvodnje električne energije od 506 gigavata koja se planira graditi na planinskom području grada Slovinj na području općine Glamoč.

II.

Zadužuje se Federalno ministarstvo energije, rudarstva i industrije da pristupe aktivnostima iz člana 23. stav 4., 5., 6. i 7. i člana 24. Uredbe o postupku, kriterijima, formi i sadržaju zahtjeva za izdavanje energetske dozvole za izgradnju i rekonstrukciju postojećih proizvodnih postrojenja („Službene novine Federacije BiH“, br. 27/14) na izdavanju energetske dozvole iz tačke I. ovog zaključka.

### III.

Ovaj zaključak stupa na snagu narednog dana od dana objave u „Službenim novinama Federacije BiH“.

#### **9. Izvještaj Fonda za profesionalnu rehabilitaciju i zapošljavanje osoba sa invaliditetom za 2022. godinu**

Fond za profesionalnu rehabilitaciju je dostavio: Izvještaj o radu Fonda za profesionalnu rehabilitaciju i zapošljavanje osoba sa invaliditetom za 2022. godinu; Izvještaj Upravnog odbora o poslovanju Fonda za profesionalnu rehabilitaciju i zapošljavanje osoba sa invaliditetom za 2022. godinu; Izvještaj o radu Nadzornog odbora Fonda za profesionalnu rehabilitaciju i zapošljavanje osoba sa invaliditetom za 2022. godinu i Izvještaj o izvršenju Finansijskog plana Fonda za profesionalnu rehabilitaciju i zapošljavanje osoba sa invaliditetom za 2022. godinu.

Izvještaje su razmatrala radna tijela.

U raspravi niko nije učestvovao.

Na osnovu rezultata glasanja, predsjedavajući je konstatovao da je Dom naroda, sa 50 glasova za, uz 1 suzdržani glas i bez glasova protiv, prihvatio sljedeći:

#### **Z A K L J U Č A K**

Dom naroda Parlamenta Federacije Bosne i Hercegovine je usvojio Izvještaj o radu Fonda za profesionalnu rehabilitaciju i zapošljavanje osoba sa invaliditetom za 2022. godinu; Izvještaj Upravnog odbora o poslovanju Fonda za profesionalnu rehabilitaciju i zapošljavanje osoba sa invaliditetom za 2022. godinu; Izvještaj o radu Nadzornog odbora Fonda za profesionalnu rehabilitaciju i zapošljavanje osoba sa invaliditetom za 2022. godinu i Izvještaj o izvršenju Finansijskog plana Fonda za profesionalnu rehabilitaciju i zapošljavanje osoba sa invaliditetom za 2022. godinu.

#### **10. Izvještaj o zaduženju Federacije Bosne i Hercegovine na osnovu emisije (7Y) obveznica**

Vlada Federacije Bosne i Hercegovine je dostavila Izvještaj o zaduženju Federacije Bosne i Hercegovine na osnovu emisije (7Y) obveznica radi informiranja.

Izvještaj su razmatrala nadležna radna tijela.

U raspravi niko nije učestvovao.

Budući da je Izvještaj dostavljen radi informiranja, predsjedavajući je konstatovao da je Dom naroda Parlamenta Federacije Bosne i Hercegovine primio na znanje Izvještaj o zaduženju Federacije Bosne i Hercegovine na osnovu emisije (7Y) obveznica.

### **11. Kvartalni izvještaj o dugu Q1/2023**

Vlada Federacije Bosne i Hercegovine je dostavila Kvartalni izvještaj o dugu Q1/2023 radi informiranja.

Izvještaj su razmatrala nadležna radna tijela.

U raspravi niko nije učestvovao.

Budući da je Izvještaj dostavljen radi informiranja, predsjedavajući je konstatovao da je Dom naroda primio na znanje Kvartalni izvještaj o dugu Q1/2023. godine.

### **12. Godišnji plan zaduživanja za 2023. godinu**

Vlada Federacije Bosne i Hercegovine je dostavila Godišnji plan zaduživanja Federacije Bosne i Hercegovine za 2023. godinu radi informiranja.

Godišnji plan su razmatrala nadležna radna tijela.

U raspravi je učestvovao delegat Almir Babajić.

Godišnji plan zaduživanja za 2023. godinu obrazložio je predstavnik Vlade Federacije.

Budući da se radilo o materijalu koji je dostavljen Parlamentu Federacije Bosne i Hercegovine radi informiranja, predsjedavajući je konstatovao da je Dom naroda Parlamenta Federacije Bosne i Hercegovine primio na znanje Godišnji plan zaduživanja za 2023. godinu.

### **13. Zaključci Odbora za ekonomsku i razvojnu politiku vezano uz status Agencije za privatizaciju Federacije Bosne i Hercegovine**

Dom naroda je na 1. sjednici, održanoj 30.3.2023. godine, zadužio Odbor za ekonomsku i razvojnu politiku, finansije i budžet da u saradnji sa Vladom Federacije Bosne i Hercegovine riješi statusne, finansijske i materijalne probleme o radu Agencije za privatizaciju.

Predstavnički dom Parlamenta Federacije Bosne i Hercegovine obavjestio je Dom naroda da je na 3. sjednici, održanoj 6.7.2023. godine, usvojio zaključke Odbora za ekonomsku i finansijsku politiku Predstavničkog doma Parlamenta Federacije Bosne i Hercegovine.

Odbor za ekonomsku i razvojnu politiku, finansije i budžet u cilju realizacije zaključka Doma naroda održao je dvije sjednice, te sudjelovao na Tematskoj sjednici Odbora za ekonomsku i razvojnu politiku Predstavničkog doma.

Odbor za ekonomsku i razvojnu politiku, finansije i budžet je na 3. sjednici, održanoj 12.5.2023. godine, podnio Izvještaj kojim je predložio Domu naroda da usvoji zaključke.

U raspravi je učestvovao Oliver Soldo.

Na osnovu rezultata glasanja, predsjedavajući je konstatovao da je Dom naroda, sa 50 glasova za, uz jedan uzdržani glas i bez glasova protiv, prihvatio sljedeći:

### **Z A K L J U Č A K**

1. Zadužuje se Vlada Federacije Bosne i Hercegovine da pripremi nacrt sporazuma (sa svim potrebnim elementima: visina glavnice duga i kamate, visina otpisanih potraživanja, rok otplate, te način i hitnost deblokade računa Agencije za privatizaciju FBiH) izrneđu Agencije za privatizaciju Federacije Bosne i Hercegovine i firme „SA DAGITIM“ d.o.o. Kreševo prema presudi Vrhovnog suda Federacije Bosne i Hercegovine br. 06109319 rev od 15.12.2019. sa ciljem izrnirenja duga po presudi. Rok za pripremu nacrtu sporazuma je 15 dana.
2. Zadužuje se Vlada Federacije Bosne i Hercegovine da pokuša naći rješenje u vidu isplate jednokratne finansijske pomoći uposlenicima Agencije za privatizaciju Federacije Bosne i Hercegovine u što kraćem roku.
3. Dom naroda Parlamenta Federacije Bosne i Hercegovine će održati tematsku sjednicu na temu „Suština i značaj nastavka procesa privatizacije u Federaciji Bosne i Hercegovine i uloga Agencije za privatizaciju Federacije Bosne i Hercegovine u istom“.

### **14. Izbor i imenovanja**

Prijedlog Odluke o izmjenama Odluke o izboru predsjednika, zamjenika predsjednika i članova radnih tijela Doma naroda Parlamenta Federacije Federacije Bosne i Hercegovine

Komisija za izbor i imenovanja utvrdila je Prijedlog Odluke o izmjeni Odluke o izboru predsjednika, zamjenika predsjednika i članova radnih tijela Doma naroda Parlamenta Federacije Bosne i Hercegovine.

Budući da je Gospava Kozar 26.6.2023. godine obavjestila Komisiju za izbor i imenovanje da je podnijela ostavku na mjesto članice Komisije za jezička pitanja iz reda stručnih, naučnih, kulturnih i javnih radnika, na sjednici 31.7.2023. godine za člana Komisije za jezička pitanja iz reda stručnih, naučnih, kulturnih i javnih djelatnika imenovan je Ranko Pejanović na prijedlog Kluba delegata srpskog naroda u Domu naroda.

Također, za drugu članicu Komisije za jezička pitanja iz reda stručnih, naučnih, kulturnih i javnih radnika nije navedeno puno ime, umjesto Ana Tadić Jakovljević zamjenjuje se sa Ana-Marija Tadić-Jakovljević.

Predsjedavajući je pozvao predsjednika Komisije gospodina Milana Ševu da obrazloži izveštaj komisije

U raspravi niko nije učestvovao.

Na osnovu rezultata glasanja, predsjedavajući je konstatovao da je Dom naroda, sa 50 glasova za, bez suzdržanih glasova i bez glasova protiv, donio Odluku o izmjenama Odluke o izboru predsjednika, zamjenika predsjednika i članova radnih tijela Doma naroda Parlamenta Federacije Bosne i Hercegovine kojom je Gospava Kozar razrješena članstva u Komisiji za jezička pitanja iz reda stručnih, naučnih, kulturnih i javnih radnika a umjesto nje je za člana Komisije imenovan Ranko Pejanović i kojom se riječi: „Ana Tadić Jakovljević“ zamjenjuju riječima: „Ana-Marija Tadić Jakovljević“.

Sjednica je završila rad u 20 sati i 22 minute.

\* \* \*

Transkript sjednice čini sastavni dio Zapisnika.

SEKRETAR

Izmir Hadžiavdić

PREDsjEDAVAJUĆI

Tomislav Martinović